

**TATA IBADAH MALAM NATAL
GKPS PADANG BULAN
RESORT POLONIA – MEDAN
Kamis, 24 Desember 2020**



Tema

Ibohali Manghobaskon Horja na Madear

(2 Timoteus 3:17)

Sub Tema

Pasirsir ma kuria in ase gabe sipambobai na toruh maruhur, sihabiari Naibata, sibalosi ajar, ibagas biak na madear, ase lambin tarbarita goran ni Kristus

(Matius 5 : 18-19: Markus 9 : 35)

I. PERSIAPAN IBADAH

) **Persiapan Live Streaming + Martonggo**

Siboan Doding : Hita haganupan na hinarga ni Tuhan, Patut hita marmalas ni uhur bani borngin on bani idopni uhur ni Tuhan na ijalo hita. Jumpah ma use ari pesta pardingatan partubuhni Tuhan Jesus sipaluah in. Hita haganupan na hinargani Tuhan, Sihol pungkahonta ma Kebaktian Malam Natal on. Dear, parlobei Martonggo ma hita ibagas uhurta bei. **(diiringi musik)**

II. IBADAH

1. VOTUM – INTROITUS – TONGGO

P : Ibagas Goranni Naibata Bapa, Anak-Ni Tuhan Jesus Kristus pakon Tonduy Na Pansing, Sitompa langit pakon tanoh on. Amen.

Haleluya! Pujionku do Jahowa humbani gokni uhurhu, i loulouanni halak parpintor ampa bani partumpuan.

K : Banggal do pambahenanni Jahowa, patut sidingaton ni sagala na mangharosuhkon-Si.

P : Sihol pujionku do Ham, ale Jahowa, itongah-tongahni bangsa-bangsa, sihol dodingkononku do Ham itongah-tongahni marga-marga.

K : Ai gijangan do marimbang langit idopni uhur-Mu, anjaha hasintongan-Mu das do ronsi hombun.

P : Maidop ma uhur-Mu bangku, Ham Jahowa, ase hubaritahon sagala puji-pijian Bamu bani horbangan ni boru Sion, anjaha marolob-olob ahu halani parpaluah-Mu.

K : Puji ma Tuhan, ale tonduyhu! Puho ma arbab pakon husapi, sihol puhoanku do buha siang ari, sihol pujionku do Ham, ale Jahowa, i tongah-tongahni bangsa-bangsa, sihol dodingkononku do Ham i tongah-tongahni marga-marga

P : Patimbul Ham ma diri-Mu mangatasi langit, Ham Naibata, anjaha hu sab tanoh on hamuliaon-Mu, ase maluah halak na hinaholongan-Mu. Paluah Ham ma marhitei tangan siamun-Mu anjaha balosi Ham ma ahu.

K : Napuji ma Jahowa sadokahni-dokahni! Amen! Nai ma amen!

P : Martonggo ma hita! Ham Tuhan Naibata Bapanami na i nagori atas. Ipuji hanami do goran-Mu Na Pansing in, halani na dob iparayak Ham hanami marhitei Anak-Mu Jesus Kristus. Itogu Ham do hanami humbani hagolapan hu bani haliharon, gabe marpardomuan hanami pakon Ham, janah domma gabe bangsa-Mu hanami. Malas tumang do uhurnami laho mamuji pasangapkon Ham. Jalo Ham ma pamujionnami ibagas Jesus Kristus. Amen.

2. MANDODING Haleluya No. 316:1-2 “Sai Puji ma Tuhanta in”

1. Sai puji ma Tuhanta in, ai tubuh Jesus in.
Sai jalo ma Rajanta in, pasirsir ma uhurmu in.
Mandoding puji ma, mandoding puji ma,
Mandoding puji Tuhan in.
2. Megah ganup dunia on, marsangap Tuhan in.
Ganup mamuji Tuhan in, pakon ganup tinompaNiin.
Mandoding puji ma, mandoding puji ma,
Mandoding puji Tuhan in.

3. LITURGI I : Panompaon (Video)

4. MANDODING Haleluya No. 44 : 2 – 3 “Pamalas Uhurta”

2. Ai buei do dosa, parlajouan pe manunsahi hita ronsi matei pe manunsahi hita ronsi matei pe
3. Maparah tumang do hamagouan in Anggo lang roh Jesus Sipaluah in Anggo lang roh Jesus Sipaluah in

5. LITURGI II : Dousa pakon Pangkorhonni (Puisi)

6. MANDODING Haleluya No. 32:1-3 “Riap ma hita haganup”

1. Riap ma hita haganup mamuji Naibata
Mesek ma pandodingta rup,
Ai in do na tama, ai in do natama
2. Iungkab Naibatanta in nagori atas in
Isuruh do Anak ni in,
Hagoluhanta in, hagoluhanta in
3. Paratas ni BapaNi do, tinadingkoNi in
Hu hasiangan Ia roh,
ianan marsik ini, ianan marsik in

7. LITURGI III : Bagah-bagah Partubuhni Tuhan Jesus

Prolog : Ibotoh Naibata do bahasa lang boi jolma in paluahkon dirini. Hamagouan ampa hamateian do rupeini sidea. Tapi banggal do holongni Naibata, lang ipaturut jolma in totap iparjabolon dousa. Halani ai ibagahkon Naibata do haluahon in marhitei nabi-nabi.

Majelis : Lang tarbaen lang, dousa pakon kuasani maningon adong do i dunia on anjaha margogoh do tongon sibolis. Bani haganupan na hurang ni jolma in, lang anjai itadingkon Tuhan Naibata sidea lalap, ai ihatahon Tuhan Naibata do marhitei Nabi Jesaya: “*Tongkin do hansa hutadingkon ho, tapi marhitei holongni uhur na banggal patumpuon-Ku do ho. Sanggah pargajagni ringishu huponopkon tongkin bohingku dompak ho, tapi marhitei idop ni uhur sisadokah ni dokahni idopan-Ku do ho, nini Jahowa, sipaluah ho (Jesaya 54:7-8)*”.

Remaja : Bani Mika 5:1 ihatahon Tuhan Naibata do: “*Tapi anggo ho, ale Betlehem Eprata, age pe etek ho i tongah-tongah ni marga Juda, humbam do roh bangku na gabe panggomgomi bani Israel, anjaha*

harohanni humbani nahinan, humbani ari na basaia". Malas do tumang uhur nami sikolah minggu mambasa ampa manangar bagah-bagah pasal parrohni Sipaluah hun huta na etek, tapi mamboan pasu-pasu na banggal bani haganup bangsa.

Naposo : Patut marmalasni uhur hita mardingat bagah-bagah pasal parrohni sipaluah na ipadas Tuhan Naibata marhitei Nabi Sakaria na mangkatahon: *"Marmalas ni uhur tumang ma ho, ale boru Sion, marolob-olob ma ho are boru Jerusalem! Tonggor ma, na roh do rajamin marayak ho; parpintor anjaha siparmonang do Ia. Toruh do uhur-Ni anjaha mangajak halode, anak ni halode boru-boru (Sakaria 9:9)"*. Marmalasni uhur ma tongon haganup halak na porsaya, na manjalo Raja parpintor ampa parmonang in.

Bapa : Itatap anjaha ipardiatei Tuhan Naibata do halojaon ampa hamarsikon ni bangsa-Ni, marhitei parrohni Sipaluah das hubani panorang totap do Naibata marhorja, ai ipadhanon Naibata do bani Amos 9:11: *"Bani ari ai pajongjongon-Ku do lampo-lampo ni si Daud na dob mareong in, paulion-Ku ma tembokni na mangkabungbung, anjaha umbanon-Ku sagala na mangkareong, paulion-Ku do use usih songon na bani mula-mulani"*.

Inang : Bani haganupan situasi na borat, borit anjaha borot na idompakkon jolma pangkorhonni dousa in, ipatotap Naibata do haporsayaon ampa pangarapanni sidea marhitei bagah-bagah haluahon na iapdas Nabi Jeremia na mangkatahon: *"Ai Hubotoh do torang sura-surangku pasal hanima, nini Jahowa. Ai ma sura-sura hadearon, sedo hamagouan, laho pasirsirhon bannima parsaud ni na niarapkonnima (Jeremia 29:11)"*.

Lansia : Sanggah tarsosak jolma bani lombang bagas ni hagolapan halani dousa in, roh do hatani Naibata marhitei Nabi Nahum na mangkatahon: *"Pardear layak do Jahowa, Benteng bani panorang hasosakan' anjaha itanda do na marhaporusan Bani (Nahum 1:7)"*. Ibagahkon do Sipaluah na laho mangurupi jolma in mandaihon idopni uhur na pinasirsir ni Naibata.

Majelis : Domma dear haganupan iaturhon Naibata dalam laho paluahkon jolma, domu hubani hapentaran ampa hagogohonNi sandiri. Talar do rencana haluahon ai tarsurat bani Maleakhi 3: 1 na mangkatahon: *"Tonggor ma, suruhon-Ku ma suruhan-Ku, ase ipasirsir dalam i lobei-Hu, jadi sompong ma roh Tuhan, na pinindahannima ai, marayak rumahNi; suruhanni parpadanan, na hinasiholhonnima ai, tonggor ma, na roh ma Ia, nini Jahowa Zebaot"*.

8. MANDODING Haleluya No. 314:1-2 "Doding ni Malekat in"

1. Doding ni malekat in, pasangapkon Tuhan in. Na mambere hasonangan, Raja na dob tubuh in Haganupan bangsa-bangsa, sai mamuji bani Tuhan Jesus na hun surga in tubuh i Betlehem in Doding ni Malekat in, pasangapkon Naibata
2. Ganup na i surga in, sai manombah Tuhan in Tuhan Jesus jadi jolma, roh bai hajolmaon in Lao mamboban haluahon, ganup dousa isalpuhon Goran-Niin Immanuel, rapkon hita Naibata Doding ni Malekat in, pasangapkon Naibata

9. LITURGI IV : Partubuhni Tuhan Jesus (Visualisasi)

**10. PAGARA LILIN: MANDODING Haleluya No. 39:1-3
“Sonang ni Bornginni in”**

1. Sonang ni, bornginni in, sanggah roh Jesus in;
Sonang modom do halak ganup dua mando na puho in rup.
Mangoromi AnakNi Jesus Tuhanta in.
2. Dear ni bornginni in, sanggah roh Jesus in
Bai parmahan i Betlehem in, ipatugah na hun surga in;
Domma roh Sipagoluh, Jesus, Tuhanta in.
3. Buei ni buah ijin, sanggah roh Jesus in
Tor maluah pardousa use, humbai hamagouanni hape
Ben na roh Sipagoluh, Jesus, Tuhanta in

Napagara Lilin:

- | | |
|--------------------------|----------------------------|
| - <i>Pendeta</i> | - <i>PHMJ</i> |
| - <i>Pengurus SM</i> | - <i>Pengurus Namaposo</i> |
| - <i>Pengurus Inang</i> | - <i>Pengurus Bapa</i> |
| - <i>Pengurus Lansia</i> | - <i>Pengurusi Naomi</i> |

11. MANDODING Haleluya 41: 1-2 “Domma Jumpah Use Ari Pesta in”

1. Domma jumpah use ari pesta in, partubuhonni
Tuhanta Jesus in
Turun hape ia roh hun Surga in roh manohu hujon
Hasangapon bai Naibata, damei, damei bani jolma
Megah uhurni Naibata hajolmaon use
2. Laita misir hita hu Bethlehem in, sombah hita ma
dakdanak na ijin
Tinongoskonni parholong atei in, Naibata, Bapa in
Hasangapon bai Naibata, damei, damei bani jolma
Megah uhurni Naibata hajolmaon use

12. LITURGI V: Refleksi Natal

Prolog : Marhitei Natal borngin on, patut iakuhon hita bahasani pitah idopni uhur ni Naibata do hansa na boi paluahkon hita. Domma 117 tahun ambilan na madear i tongah-tongahta, in ma hiteini Tuhan mangkasomani hita. Pataridahkon hita ma tongon ganup hinajenges na dob binahen ni Tuhan in banta marhitei ganup goluhta. Anggo sonai aha ma sibahenonta?

Majelis : Patut do tongon martarimakasih hita bani haganupan holong ampa idop uhurni Tuhan na ijalo hita das hubani panorang on. Lambin talar ma tongon karakterta ibagas na mangkobaskon horja namadear anjaha lambin taridah ma buahni marhiteihonni tahun kepemimpinan na berkarakter ibagas tahun 2020 on Marhitei perayaan natal on dear ma ase irimang-rimangi hita pasal sonaha do tongon goluhta domma nani ibobai hita kuria ronsi keluarga gabe sipambobai na toruh maruhur domu bani podah ampa ajaran ni Kristus Jesus, as na madear, marurat, marbuah ibagas pangarusion ampa habotohon pasal Kristus Sipaluah in. Marhitei natal on, na gabe pangakuan ampa komitmenhu aima “***Ijon do au Tuhanku sai suruh ham ma au, mandilo ganup jolma bai harajaonMu. Hubere ma gogohku ge panorangku pe, seng ra au marnaloja paima ganup roh***”

Remaja:(Mandodingkon...”Yesus sayang padaku, alkitab mengajarku. Walau ku kecil lemah aku ini milikNya”). Malas do uhurhu halani boi au dihut marnatal bani borngin on. Bani pardingatan partubuhni Jesus hu dunia on, lambin hubotoh ma sonaha banggal ni holongni Jesus hubangku. Hutanda do Jesus marhitei bapa pakon inang na mangajari au martonggo sonai homa marhitei guru sikolah minggu na patorangkon hubangku pasal Jesus na roh hu dunia on, tubuh i harang ni pinahan, na laho mambere haluahon bani haganup jolma, ise na porsaya hubani Jesus.

Naposo : Adong do syair ni doding na mangkatahon, “Hidup ini adalah kesempatan”, marosuh tumang do hanami namaposo manangar anjaha mandodongkon syairni lagu on. Anggo irenungkon hanami namaposo bani panorang natal borngin on goluh na ibere Tuhan bannami namaposo aima goluh na melayani selagi ada kesempatan, halani domma I bere haluahon humbani anakNi na irayahon hita borngin on. Sipata dingatan ma hanami bani Handphone ase hubani Tuhan. Marhitei natal bani borngin on, sihol ma uhur ase lambin itanda anjaha ihagoluhkon hanami holongni Tuhan in. Halani ai markomitmen ma hanami laho mandalanhon aha na sinobutni Apostel Paulus bani **1 Timoteus 4:12 na mangkatahon, “Ulang ma adong na marmapas ni uhur bam halani haposoonmu, tapi gabe siusihan ma ham bani na porsaya, ibagas hata, parlahou, holongni uhur, haporsayaon, age hapormanon”**

Bapa : Hubannami Bapa, pesta natal aima panorang laho mamareksa hadirion nami ilobeini Naibata. Isadari hanami do buei ni panorang na mambur sonin-sonin tumang pitah halani lang ihaporluhon hanami ope mananda pakon mangkaporsayai Jesus na dob roh hu dunia on. Marhitei perayaan natal on, sihol paubahon nami ma in. Ase hanami Bapa menjadi teladan itongahni keluarga, patugahkan ase haluahon humbani Tuhan Jesus dassa na boi membere hagoluhan sadokah nidokahni ai. Songon hatani umpasa na mangkatahon, nasuan ma timbahou dua gantang sadari, naubah ma parlahou ulang songon sapari. Bani pardalanni panorang, sihol ma hanami paubah uhur ase taridah tongon Jesus na dob tubuh ibagas uhurnami. Halani ai lambin ipatuduh hanami ma tugas pakon tanggung jawab hamalimon nami itongahni keluarga, kuria age masayarakat.

Inang : Sanggah panorang natal borngin on, hudingat ma sonaha si Maria inangni Jesus mang’au’hon anjaha mandalanhon horja na pinaondosni Naibata hubani. Ibagas gok ni uhur do si Maria mandalanhon tugas ampa tanggung jawabni, agepe buei resiko na maningon dompakhononnni bani panorang ai. Marhitei perayaan natal on sihol do au songon si Maria na tangi ampa unduk bani parentah ni Naibata. Gabe inang na totap porsaya bani pangkasomanionni Tuhan bani haganup lakkah age horja. Adong pos ni uhur pasal aha pe ai sipikkirhonon ampa bageini paruntolon. Totap gabe inang na tangguh, inang sipartonggo anjaha sitiruon. Halani ai bani borngin on sihol irikhonon ampa amenhononhu do pangakuan ni si Maria na tarsurat bani Lukas 1:38 ai nini si Maria do **“Tonggor ma, jabolon ni Tuhan in do ahu. Sai saud ma hubangku songon hinatahonmu in”**.

Lansia : Malas tumang do uhuruhani bani panorang na ibere Tuhan hubangku mandihuti Natal borngin on. Bujur do tongon Tuhan na manramothon goluhku das bani panorang on. Ibagas hatuaon, ipasompat idopni uhurni Tuhan ope au mangkamalashon pardingatan partubuhni Jesus hu dunia on. Takkas tumang do hutanda holongni Tuhan in hubangku, ai hudingat do tongtong hatani Tuhan bani Jesaya 46:4 na mangkatahon: **“Das bani hatuaonnima totap do tong Ahu, ronsi na ubanon hanima, Ahu do tong mangambah hanima. Ahu do na dob mambahen ai, anjaha Ahu ma na mangambah, Ahu ma na mangusung anjaha Ahu ma na paluahkon”**. Marhitei natal borngin on, lambin huidah anjaha huahaphon ma sonaha do tongon pangiring-iringni Tuhan bani goluhku. Jesus na roh hu dunia on marianan ibagas uhuruhani laho manorangi pingkiran pakon langkahku ibagas mandalani hatuaonku.

Majelis : Lang piga dokah nari marpunsa ma tahun 2020, na mararti salosei ma homa idalani hita “Tahun Kepemimpinan yang berkarakter”. Ibagas pangarapan, lambin tangkas ma taridah karakter janah identitasta ibagas na mandalani pargoluhan on baik ai malas ni uhur pakon pusokni uhur sonai age na lobih hurang bani goluh on. Bani 1 masukonta tahun 2021 marhiteihon sada Tema kegiatan pasal Persekutuan pakon Pelayanan yang berdampak naija ase haganup kuria boi saling menopang janah menguatkan ampa na sari itongah-tongah ni pergumulan ni goluh. Perayaan natalta borngin on sihol pahotkon tekad ampa komitmenta laho pataridahkon sada pangidangion na berdampak janah na sari bani tahun 2021 on gabe sada gaya hidup itongah-tongahni keluarga, gareja age i masyarakat. Haganup do hita gabe pelayan, pelayan bani dirinta sandiri sonai age pelayan bani haganup situasi na idompakkon hita. Bani na sihol idalani hita tahun 2021 on, tontu maningon lambin orod do hita hubani Jesus Kristus, na gabe teladan bani goluhta. Amen!

13. TONGGO SYAFAAT : St. Surya Sembiring

14. MANDODING Haleluya No. 37:1-3 “Hatuahon Do, Hamegahon Do”

1. Hatuahon do hamegahon do partubuhonni Jesus in
Roh Sipaluah bani na magou, megah-megah ma uhurta in
Roh Sipaluah bani na magou, megah-megah ma uhurta in
2. Hatuahon do hamegahon do partubuhon ni Jesus in
Rapat ma hita, bai Naibatanta, megah-megah ma uhurta in
Rapat ma hita, bai Naibatanta, megah-megah ma uhurta in

3. Hatuahon do hamegahon do partubuhon ni Jesus in
Megah uhurta bani Tuhanta, megah-megah ma uhurta in.
Megah uhurta bani Tuhanta, megah-megah ma uhurta in

15. AMBILAN : Jesaya 9 : 1 – 6 (Pdt. CH. Purba, S.Th)

16. MANDODING Haleluya No.313 : 1-3 (Galangan)

1. Humbai pulo ‘ge banua sai tarbogei do torus
Doding na mamuji Tuhan Sipanobus jolma in
Glo..ria puji ma Tuhanta
Glo..ria puji ma Tuhanta
2. Haganupan na i surga pasangapkon Naibata
Rap mandoding do sidea i lobei ni Naibata
Glo..ria puji ma Tuhanta
Glo..ria puji ma Tuhanta
3. Soridadu ni Tuhanta hormat bani Naibata
Haganup puji-pujian ondos bani Naibata
Glo..ria puji ma Tuhanta
Glo..ria puji ma Tuhanta

17. TONGGO GALANGAN – PANUTUP – PASU-PASU

P : Martonggo ma hita mangondoskon galanganta hubani Tuhan Naibata.... (Agenda GKPS) Amen.

Riap ma hita martonggo songon naiajarhon Tuhan Jesus banta

P+K : Ham Bapa nami na i nagori atas...Amen

P : (Padaskon pasupasu) Idop ni uhur ni Tuhan Jesus Kristus, ampa holong niatei ni Naibata Bapa, ampa parsoran ni Tonduy Napansing ma mangkasomani nasiam/hita haganupan. Amen

(Syalom.....Horas, horas, horas !!!)